

Arroyo hadiri Kemuncak OIC sebagai pemerhati

29 SEP 2003

SUBANG 28 Sept. — Presiden Filipina, Gloria Macapagal Arroyo akan menghadiri Sidang Kemuncak Pertubuhan Persidangan Islam (OIC) Sesi Ke-10 di Putrajaya, sebagai pemerhati.

Perdana Menteri, Datuk Seri Dr. Mahathir Mohamad memaklumkan perkara itu kepada pemberita di Pangkalan Tentera Udara Diraja Malaysia (TUDM) di sini hari ini sekembalinya dari lawatan ke luar negara.

“Dia (Arroyo) akan datang Oktober ini sebagai pemerhati,” katanya.

Dalam Perhimpunan Agung Pertubuhan Bangsa-Bangsa Bersatu (PBB) kelmarin, Arroyo berkata, negaranya akan berusaha mendapatkan status pemerhati dalam OIC.

Status itu penting bagi Filipina dalam usaha negara itu menyelesaikan pergolakan selama 30 tahun yang berlaku di selatan Mindanao.

Khamis lalu, Arroyo telah menemui Dr. Mahathir di New York untuk membincangkan proses damai bersama Barisan Pembebasan Kebangsaan Moro (MILF).